

秋心稿

窗前

愛向窗前放遠眸。數峰蒼翠白雲悠。清風亦是多情子，搖得花紅近小樓。

但看

但看多情誰負手，長河日影漸蕭條。秋心欲託無由託，坐對天風掀晚潮。

襟抱

未開襟抱已成秋。對此誰堪泣欲流。何必一番風雨後，尋常世事亦幽憂。

春雨

乍晴春色動人碧，到處青蔥催遠瞻。翻墨山雲逐風去，無端又下水晶簾。

示子四首錄二

其一

縱使心胸清似冰。須知天地本多蠅。高才夙慧不堪倚，合有真誠爲汝朋。

其二

望汝單純不負吾。人生百載取長途。任情痛哭率性笑，留爾天真還守愚。

隄上 與妻重到，慨然有嘆

無限奔濤捲落暉。長隄景物未全非。海天盡處蕩漁艇，鷗鷺過時看釣磯。清夢當年來悄悄，青春此日去依依。情懷漸欲隨殘碧，一片秋心自隱微。

奈何

奈何世事屬秋心。直有愁懷動苦吟。歌裏青春容易過，酒邊幽夢忽然侵。生涯已是立身晚，困頓只知隨夜深。對影書生頻岸幘，燈前鬱鬱懶披襟。

不寐

感舊況逢風雨夜，疏頑如我又經年。已無壯志仍爲客，空有清詩不計錢。興到重題幾行字，燈殘始作五更眠。分明點滴煩人耳，坐對蒼茫欲曉天。

春雨

久坐閣中聽點滴，霖鈴一曲不曾休。落花有淚但無語，飛燕翻簾堪破愁。暫倚紗窗試新履，偶承簷雨淪清甌。憑風休問從此去，春到天涯第幾州。

華城道中偶感

迢遞青岑頻入眼，朱門漫數計歸程。偶看落日依山樹，略向斜風聽鳥聲。識見總羞無一是，功名只嘆了難成。文章事業詩人骨，合向書中磨此生。

苦悶

幾番煙雨愁人眼，偶得天開半日晴。雲自悠閒留不住，山因淨碧畫難成。把卷相看求一樂，螿龍誰與困孤城。當年心事今何在，坐聽殘蟬三兩聲。

秋日看山思及人事嘿然有作

五斗欣然便折腰。書生意態太蕭條。蟬聲已逐秋聲遠，氣骨應成白骨銷。看汝風雲任翻覆，守愚溪壑轉迢遙。青山無恥逢人媚，黃雀青蠅各自驕。

萍

莫向青萍問蹤跡，一川細雨去還留。身隨浪腳更何處，家在風前第幾州。落拓君疑江海客，踟躕我本歲時囚。近來漸覺少年誤，錯信無根是自由。

秋日值西洋萬聖節精怪盈道慨然漫題

黃花未老無人問，九日茱萸肯細看？舊節寂寥誰與語，多情慘澹不成歡。聊停濁酒空相對，且上高樓爲自寬。魑魅只今猶咄咄，青山一脈漸秋寒。

雨中夢讀白石詞覺而怨悱盈懷有吟

冷盡千峰不肯還。輕盈嬌軟夢魂間。幽心送去歡情薄，悵緒飛來別枕閒。雲外乍留香縷縷。燈前未許淚潸潸。隔簾小雨深深院，空鎖清秋無數山。

秋日追記今夏二叭子植物園避暑遇雨

路轉谿山迷暈眼，老林深秀鳥時聞。蟬因樹密知難見，花本香微歎少薰。接地層雲渾欲潑，兼天一氣但如焚。我今身在最高處，亂雨斜風誰可分。

過南海路植物園看荷有懷

粉紅遍墜香依舊，悵憶當年夢裏人。一別而今廿餘載，不知何處綺羅身。翻風翠袖惜花骨，挹雨玉盤傾水銀。搖蕩參差望相似，清芬倩影兩非真。

對菊偶然隔句有對戲以成篇

君是花中真隱者，每從塵網脫身來。我如寰外先逃客，欲把襟懷向汝開。一寸冰心空繾綣，甲衣次第落層臺。無邊秋氣元蕭瑟，世事蒼茫傾舊醅。

前日道遇獼猴倚橋看山有感

歸途此去路不平。休出危壁看崢嶸。相遇橋上猴不驚，乃與蒼崖同忘形。雲流風起遠山綠。幽林生涯豈是俗。身遠世網天地寬，何須勞形換珠玉。

擬古六首

其一

惆悵情何極，中夜懷使君。相看但皓月，記否綠羅裙？迢迢千里道，行路各紛紛。獨坐空閨裏，衷曲誰復聞？歲月一荏苒，雲鬢霜漸染。蕩子行不歸，錦衾亦云忝。感此秋風涼，繡戶秉燭掩。聊把袖中書，一一自檢點。

其二

樓上亭亭月，花邊款款蝶。牀頭深深篔，尺素重重疊。良人日已遠，魚雁消息歇。花月憶同遊，今日歡情沒。遊子去何之，恩薄涼到骨。

其三

人生不長久，且進杯中物。感此情惻惻，衷心何鬱鬱。君無玉石堅，我非喬松質。彭祖事已遠，未遺養生術。適值良宴會，相娛在今日。盤餚盡一空，歌曲但放逸。一曲復一杯，當此百憂失。但惜今時歡，他日死不恤。

其四

琴酒各爲樂，歡娛在倡樓。盤兼玉食饌，歌帶紅裙謳。鶯聲何清新，百金價莫酬。或問歌者事，婉轉出歌喉。昔爲千金子，窈窕無憂愁。今爲倡家女，辛苦長不休。願勿永如此，早結有情儔。

其五

緩緩浮雲飛，下有雕梁臺。拾級十九重，左右花葳蕤。臺中坐奇士，長嘯聲若雷。鶴髮結玉冠，劍指捋鬚眉。問其所從來，云在仙山栖。爲求長壽考，到此蒔瓊芝。瓊芝一何稀，壽考能無疑？哀歎復哀歎，速老使人悲。

其六

采采木樨花，山木多芬芳。馥郁盈磴道，采之袖中藏。藏之欲致遠，誰爲傳遠方。相思無窮已，憂思何悲涼。

蝶戀花 秋思

蘆管芒花吹已盡。蕭瑟清秋，賸有無窮恨。最記春風花上鬢。黃花枯瘦腸縈損。
舊夢如今誰可問。枕上深深，有淚痕盈寸。風月無邊成一瞬。夜闌坐對昏燈悶。

又 秋荷

最是嬌紅都被誤。香渺秋陂，墜綠雲深處。繾綣凌波誰肯去。多情卻是留難住。
百結愁腸花似雨。悵怨西風，凝佇還無語。回首依依尋舊路。水涯吟袖盈如許。

又 夜不成寐，有「燕燕歸來瘦」句，因念舊事乃成一闋
一寸相思無限柳。望極春愁，燕燕歸來瘦。無計能消春永晝。楊花細數成荒謬。
春約如今君記否。秋色年年，風露都依舊。看盡黃花凋謝久。闌干倚遍空搔首。

青玉案 閱卷無聊，見卷中塗鴉慨然憶舊有答

青春已作征鴻去。算過往，春無數。錦瑟華年都被誤。回眸只有，山城盡處。一片煙和雨。
婆娑淚眼憑誰住。直向天涯欲何訴。莫道如今愁幾許。問君能計，明年春暮。縷縷新愁緒。